

四庫全書

集部

欽定四庫全書

兩宋名賢小集卷二百十二

宋 陳思 編

元 陳世隆 補

豫章先生詩集

羅從彥字仲素南劍州羅源人從龜山遊以累舉恩授惠州博羅縣主簿紹興初卒學者稱豫章先生淳祐間諡文質有集

觀書有感

靜處觀心塵不染閒中稽古意尤深周誠程敬因粗會
奧理休從此外尋

自警

性地栽培恐易蕪是非理欲謹於初孔顏樂地非難造
好讀誠明靜定書

示書生

知行蹊徑固非艱每在操存養性間此道悟來隨寓見

一毫物欲敢相關

顏樂齋

山染嵐光帶日黃
蕭然茆屋枕池塘
自知寡與真堪笑
賴有顏瓢一味長

邀月臺

矮作垣墻小作臺
時邀明月寫襟懷
夜深獨有長庚伴
不許庸人取次來

侗見先生出此詩嘗妄意云下雨句不甚渾然先生

因改云也知隣關非吾事且把行藏付酒杯蓋作此
數絕時正靖康間也門人李侗謹識

送南劔王守歸

三年政化被生民甘雨祥風溢劔津解組幡然賦歸去
攀轅無計可留恂

未把陽關三疊吟且將謬句寫離心千尋浩浩鐔溪水
別後不知誰淺深

勉李愿中五首

愿中以書求道甚力作詩五首以勉其意然借視聽
聾盲未知是否

聖道由來自坦夷休迷佛學惑他歧死灰槁木渾無用
緣置心官不肯思

學道以思為上孟子曰心之官則思
書曰思曰睿睿作聖惟狂克念作聖

佛法一
切反是

不聞雞犬鬧桑麻仁宅安居是我家耕種情田勤禮義
眼前風物任繁華

今古乾坤共一身安身須是且安民臨深履薄緣何事

祇恐操心近天人

外吾聖人之學中韓佛
老皆有書在決擇也

彩筆畫空空不染利刀割水水無痕人心但得如空水

與物自然無怨恩

吾道當無
凝於物

權門東往絕行蹤一片閒雲過九峰不似在家貧亦好
水邊林下養疎庸

自述

松菊相親莫厭頻紛紛人世只紅塵自憐寡與真堪笑
賴有清風是故人

題一鉢菴

可憐萱草信無憂誰謂幽蘭解結愁欲得寸田斷荆棘

只消

一作
祇應

長伴赤松遊

挽吉溪吳助教二首

室富真儒業門多長者車明經方教子得第已榮家性
守仍知分天然不愛奢百年成古昔行路亦咨嗟

新生誇躑躅舊德嘆凋零冷帶商岩月光凌處士星布
衣難得祿白首易窮經追想今何在溪流對洞庭

顏樂亭用陳默堂韻

平時仰止在高山要以亭名樂內顏顛倒一身渾是夢
尋思百計不如閒心齋肯與塵汗染陋巷寧容俗往還
堅守簞瓢心不改恐流乞祭向墻間

寄傲軒用陳默堂韻

自嗟踽踽復涼涼餬口安能仰四方目送歸鴻心自遠
門堪羅雀日偏長家徒四壁樽仍綠侯戶千頭橘又黃
我醉欲眠卿且去肯隨俗客語羲皇

濯纓亭用陳默堂韻

十載猶縑京洛塵歸歟那復廁朝紳君今談笑青油幕
我但巍峩烏角巾江漢使從尼父濯衣冠寧羨屈原新
欲賡孺子滄浪咏會意須還舍瑟人

題靜亭

鼎創新亭靜更幽四時景象鎮長留端如和氣衷談笑
恍若春風中泳游排闥山併藍色重憑欄水擁壁光浮
我來登賞無窮趣好把詩篇與唱酬

送愿中行

聖言天遠海潭潭獨在潛心久泳涵猥念百家非己好
妄將一貫與君談賢如賜也才知二學若陳亢只得三
此道悞來因自足卻隨鵬鳥話圖南

再用韻送延年

心源寂靜映寒潭每欲操存更養涵顧我日思攀劇論
荷君時與得高談眼前舊識知多少物外深交沒二三
幸久相親頻握手遽成分別又東南

和愿中岩桂

幾樹芬芳擅與沉枝枝若占鄰家林風搖已認飄殘菊
日照渾疑綴散金仙窟移來成美景東堂分去結清陰
我今不願蟾桂折待到蟾宮向上吟

一作待到秋
宵把酒吟

題德士退居

牛頭山頂鎖烟霞檐月松風即我家筏渡有情新活計
袋空無物舊生涯已將黃葉分雙手卻攜白茅占一窠
會得懶庸歸去路索然忘鳥更忘花

賀田溪張公遷居

華構經營占地靈濃巒環合數峯青苟完公子方成室
趨訓兒孫已過庭豈止一時誇壯麗定知百世享安寧
顧惟善頌非張老祇貢湯盤往日銘

和張公叙別

良工創新第瀟灑伴洞府經營未畢工四面方興堵蛟
龍忽夜徙空中震雷雨親舊賀於門主人迎孔戶連喚
鳳兒來藏書幾多部為我張廣筵酌賓酌以旅人謂主

公賢敦樸嗤峻宇規模出心匠務早由乃祖欲圖久安
逸勿辭暫勞苦忠孝闡家門詩禮光族緒居室云苟完
謙冲彌自處玉石不分別鶴雞為謾侶顧予局促輩鄉
評少推許嘗遊莊嶽間喜作齊人語何幸天相之幡然
交鄒魯早年欽大名馳書聊以序比來揖清風談笑揮
玉麈見之名利盡久持豈無補素志已深酌青眼猶相
與默然湯盤頌未為傾肺腑何當惠古風錦繡施殘楮
妙曲誠寡和取利憑斧柯

兩宋名賢小集卷二百十二

欽定四庫全書

兩宋名賢小集卷二百十三

宋 陳 思 編

元 陳世隆 補

象山先生集

陸九淵字子靜九韶弟乾道八年進士調靖安簿累
官著作丞光宗即位除知荆門軍務卒謚文安嘗結
精舍於貴溪之象山學者稱象山先生有集

應天山

在貴溪縣子靜隱居其中更名象山

我家應天山山高數萬丈上開園池美林壑千萬狀
山西有龍虎烟霞取相望寒清漾微波暖翠團層嶂
天光入行舟野色隨支杖吾黨二三子幽賞窮清曠
引興谷雲邊題名巖石上碧桃吹曉笙白鶴驚春漲
一笑詠而歸千載應可尚

踈山

村靜蛙聲幽林芳鳥聲警山樊紛皓葩隴麥搖青影
離

恨付西江歸心薄東嶺忽忘飢
歟憂翻令發深省

送勾熙載赴浙西鹽

平分浙江流東境浮海角其民仰魚鹽久矣困征權麥
禾與桑麻耕鋤到硤确往歲比不登場圃幾濯濯荒政
勞廟謀賑廩開數數飢羸不待飽共感君澤渥仁哉覆
育恩所惡吏齷齪教詔彌諄諄聽受祇藐藐何知國與
民足已肆貪濁流離且未還已復事推剝按察殊未曾
聖主獨先覺重貽宵旰憂顧盼求卓犖若固岷峨英懷

抱富荆璞邇來奏對語朝陽鳴鶯鶯鏘然歷帝聰簡記
諒已確外臺適虛席妙選出親擢此節豈輕授委寄重
山嶽除音九天下衆論靡瑕馭攬轡首越山青萍方在
握送君無雜言當不負所學

和鶯湖教授韻

墟墓生哀宗廟欽斯人千古不磨心涓流積至滄溟水
拳石崇成太華岑易簡工夫終久大支離事業竟浮沉
欲知自下升高處真偽先須辨只今一作古

今非

過普寧寺

在玉山縣寺
後有武安塔

偶扶藜杖過南津野寺長橋發興新
塹就清溪照鬚鬢不妨翠霧濕衣巾
山縈細棧疑無路樹絡崩崖不壓人
朝暮有程常卒卒向因攜酒上嶙峋

贈畫梅王文顯

子作寒梢已逼真不須向上更稱神
由來絕藝知音少只恐今人過古人

初夏侍長上郊行分韻得偕字

時年十五歲

講習豈無樂鑽磨未有涯書非貴口誦學必到心齋酒
可陶吾性詩堪述所懷誰言曾點志吾得與之偕

題達本菴

梁光結廬其親塋名曰達本求言於余敬賦是詩以
助孝德

孩提無不愛其親不失其心即大人從此勸君休外慕
悅親端的在誠身

玉芝歌

淳熙戊申余居是山夏初與二三子相羊瀑流間得
芝草三偶相比如卦畫成華如蘭玉明冰瑩洞徹照
眼乃悟芝蘭者非二物也已酉上巳復覩瑤芽迫歸
拜埽不及見其華是日訪風練飛雪始得一華方掇
至案間時雲菴僧適至且求余言為鄉道余方作是
歌因謂之曰當為子書之第持此以往會當有賞音
者紹熙元年三月二十八日象山翁書

靈華兮英英芝質兮蘭形瓊葩兮瑤實冰葉兮霜莖石

室兮宛宛苔菌兮菁菁蔭長松之偃蹇帶飛瀑之琮瑋
實青端而黃表眇中藏而不矜匪自昭其明德羌無愧
兮疇能

與僧淨璋

自從相見白雲間離聚常多會聚艱兩度逢迎當汝水
數年隔濶是曹山客來濯足傍僧怪病不烹茶侍者閒
不是故人尋舊隱只應終日閉禪關

鷺

巧轉風臺急筦清逾石澗回溪好去枝枝驚夢無人心
到遼西

子規

柳院竹齋茅店雲無風樹煙溪聽徹殘陽曉月不論巴
蜀東西

少時作

從來膽大胸膈寬虎豹億萬虬龍千從頭收拾一口吞
有時此輩未妥帖哮吼大嚼無毫全朝飲渤澥水暮宿

崑崙巔連山以為琴長河為之絃萬古不傳音吾當為
君宣

聞鸚

百喙吟春不暫停長疑春意未丁寧數聲綠樹黃鸝曉
始笑從前著意聽

曉春出箭溪二首

命駕不辭春逕泥少蓬高會帝城西物非吾輩終無賴
書笑蒙莊只強齊天人湖光隨廣狹山藏雲氣互高低

誰憐極目芟芻裡
隱隱蒼龍卧古堤

兩宋名賢小集卷二百十三

欽定四庫全書

兩宋名賢小集卷二百十四

宋 陳 思 編

元 陳世隆 補

魯齋詩集

王栢字會之金華人初號長嘯後更號魯齋受業何
北山之門郡守蔡抗揚棟台守趙景緯相繼聘麗澤
上蔡兩書院四方從學者日衆咸亨十年卒賜諡文

獻有集

赤松即景

平生百慮懶尚有立壑心佳哉二三友同盟時幽尋壯
懷豁虛曠元宮窮邃深時方釀薄暑萬綠漲雲岑新篁
疑粉翠日影篩碎金瘦筇扶野步羽扇搖清吟漱齒掬
清泚雪瀑開風襟脫中挂琪樹露頂涵重陰山禽自在
語濁醪自在斟物外轉栖碧石險蒼苔侵何時侶麋鹿
結茅入深林

和葉聖予小桃源韵

二仙何如人夫豈古隱士道成遡次寥羊卧不再起鸞
鶴舞松聲蕭騷快心耳金竈清塵生餘丹不輕委我來
桃源遊直窮路所止飛蘿搖春烟素雪噴清泚何時架
草堂深入此裏翛然逃世慮鍊魄繼遐軌

送立齋入閩哭久軒

雙溪秋氣深送子臨古道古道如掌平四顧行人少行
行復行行何日度南嶠故人今已矣轉憶平生好世事

浩無涯愁雲黯江表

送希夷之江西

小雨斂輕塵秋聲滿亭驛驅車過南浦別懷徒褻積世
道斯凌夷為善不自力一朝魯兩生為人作行色誰知
離索悲有甚萬鐘失

和寬居見懷韻

北望戲馬臺荆榛滿中路英氣一何多懷古渺難泝山
河腥日月虎豹沐雨露纍纍楚猴冠異哉天所賦豈無

濟川才淹留秋不暮清風從何來灑灑定吾故贈我金
琅玕鑿來雙魚素

秋熟

西風不力征老火未甘退蟬聲亂耳繁癡蚊健始最一
雨從天來不復有故態天序自分明人心其少耐

舟中和葉聖予

桐江波漸滑霽色午方開香火嚴蘭若烟霞老釣臺唯
高微徑險水轉萬山回欲訪先生裔相從買一坏

江濶風帆急潮回沙露痕寒林無剩葉茅舍各成村雁
落烟波渺鴉歸野色昏未知孤客棹今夜泊誰門

野興

文字飢難煮為農策最良興來鉏曉日倦後卧斜陽秋
稼連千頃春花醉幾場任他名利客車馬逐康莊

和趙師日韻

我生無燕領四壁笑相如門巷堪羅雀燈窓且讀書老
來心事懶貧後故人疎尚有多情月時時到敝廬

蘭

早受樵人貢春蘭訪舊盟謝庭誇瑞物楚澤擷芳名蒼
玉裁圭影紫檀含露英奚奴培護巧苔蘚日菁菁

催雨

人世如居甌驕陽不可鉏未聞芻作狗安得夢維魚賦
斂民生槁干戈國計虛安危關一飽雨意莫躊躇

題定武蘭亭副本

玉華末命昭陵土蘭亭神蹟埋千古率更搨本入堅珉

徽帝歸袞投定武薛家翻刻愚貴遊舊石宣和龕御府
黃塵橫空飛渡河中原荆棘穴豺虎維揚蒼茫駕南轅
百年文物不堪補紛紛好事競新模傾歌醜俗亡遺矩
如今薛本亦罕見髣髴典型猶媚媮清歡盛會何足傳
右軍他帖以千數託言此筆不可再慨然陳迹興懷語
今昔相視無已時手掩塵編對舊雨

同莊叟遊山

小閣重陰一日晴清遊應已愜高情遙知雨後山光好

但想雲邊屐齒清素壁雖曾題字舊沉疴不許軟新盟
因知關吏留魚鑰漫遣奚奴候晚程

題山橋

北山之北兩山齊一逕蜿蜒石作梯腳力倦時山始好
芙蓉東畊赤松西

石磴斜溪下水隈玉虹鎖雪挂崔嵬雖然只是泉三疊
滂湃聲搖萬壑雷

重題八詠樓

樓壓重城萬井低星從天闕下分輝傷心風月客應瘦
滿眼桑麻春又肥山到東南皆獨立水流西北竟同歸
倚闌莫問齊梁事斷石淒涼卧落暉

大安中途迷道作此自警

未識大安道行行多路歧人言訛近遠山徑倍嶽巖自
有康莊處多因便捷移我今知堠子萬里不須疑

兩宋名賢小集卷二百十四

欽定四庫全書

兩宋名賢小集卷二百十五

宋 陳 思 編

元 陳世隆 補

慈湖小集

楊簡字敬仲慈溪人乾道五年進士寧宗朝累官將
作少監出知温州以寶謨閣學士致仕卒諡文元學
者稱慈湖先生有慈湖甲稿

撫琴行

卷二百十五

蕭蕭指下生秋風
浙浙幽響聽寒空
月明夜氣清人骨
何處仙風搖丁東
野鶴驚起舞流水
咽復鳴一唱三嘆
意未已幽話出太古
情龍吟虎嘯遮神怪
千山萬壑風雨悔
海濤振盪林木響
亂撒金盤水雹碎
和風回春陽縹緲
孤鸞翔三江五湖
烟水濶波聲颼颼
鳴漁榔悲猿臨澗
欲渡不敢渡但聞
澗底一作下蕭瑟
松風長閒雲曳碧
落勢去還迴薄神
仙恍惚無定所微
吟似欲止所

作馭風一笑歸蓬瀛猶有餘音遶寥廓

送張大著出守衡陽

濟濟衆賢俱徐徐五馬驅中司親雁序南岳佩魚符吳
楚從今異參辰幸小殊他時羣玉聚相與話踟躕

淨土院擊竹軒

在富陽縣

我對此君無一事自言幽處直千金古人今已成陳迹
猶向當年擊手處尋

進月堂

在富陽縣洪氏浴堂院

金史紀事本末卷一百十五
我有一輪月不圓又不缺更無晝與夜光耀常洞徹縱
有茅屋遮亦莫知間絕持此以為燭難作進退說

石魚樓

多謝天公意已勤四時換景示吾人碧桃紅杏分明了
綠艾紅榴次第陳秋雁聲中休鹵莽雪梅枝上莫因循
機關踏著元非彼正是吾家固有身

箇裡包坤彼括乾精神微動便紛然桃紅柳綠春無迹
魚躍鳶飛妙不傳麥浪豈綠風袞袞荷珠不為露涓涓

分明是了何言否此事難容鄭氏箋

遊樂平明巖

西風吹作明巖去石屋高虛滴如乳是誰不是洞中仙
無人自信吾為主

偶成

春入園林種種奇化工施巧太精微山禽說我胸中事
烟柳藏他物外機既遣杏桃呈示了又令蜂蝶近前飛
如何有眼無人見只解西郊看落暉

腳踏和風步步春石魚樓上等閒人興來衝口都成句
眼去遊山不動塵李白誰知他意思桃紅漏洩我精神
忽逢借問難酬對只恐流鶯說得真

風雲雨雪自何來我有乾元大矣哉萬景出奇供杖履
羣峯環翠供樓臺興來吟咏誰裁剪飯罷遊行自往回
信口道來俱妙義教人尋訪幾枝梅

我吟詩處鶯啼處我起行時蝶舞時踏著此機何所似
陶然如醉又如癡

學
堂
印
信

兩宋名賢小集卷二百十五

欽定四庫全書

集部

兩宋名賢小集卷二百

十六至
二十

詳校官中書臣孫溶

助教臣常循覆勘

總校官編修臣王燕緒

校對官助教臣汪錫魁

謄錄監生臣朱恩

欽定四庫全書

兩宋名賢小集卷二百十六

宋 陳思 編

元 陳世隆 補

洛水小集

程秘字懷古休寧人都使湮十五世孫甫十歲有詠
冰詩云莫言此物渾無用曾向滹沱渡漢兵識者奇
之紹興四年擢進士授昌化簿應博學宏詞科除建

康教授寧宗時改知富陽以薦除宗正簿尋直學士
院理宗初兼侍讀除禮部尚書紹定改元乞祠外補
除福建路招捕使累疏乞休以端明殿學士致仕卒
秘以詞章稱當時世系本河北洺州自號洺水遺民
有集三十卷

三月十八鎖試童子侍具行卷蕭然無事成三十
韻漫呈同省

旬雨埋青冥今晨浴新陽老紅墮萬劫稚綠羅千行葉

碎青槐古條淨紫薇香去歲護篔簹今年已蒼筤

古史
窗前

竹萌余去年護之
甚至今皆蒼竹矣

翩翩鵲引雛伊優雀繞墻有象成熙

愉對時多慨慷門外車馬喧省中日月長要之非大快

大快在滄浪滄浪興何窮風帆十丈檣明日酌巖君

自
履

入

浮丘蔚南翔

浮丘飛升於
徽之黃山

快馬抹青山恍入萬松莊

先廬山中多老人雪巔更眉龐持酒相勞苦兒童紛迎將

小臥聽雪塢

以下皆山
中景物

徐步堆雲鄉玉界梅萬本烟海

杉千章三峽桃源浪九夏水巖霜危橋跨長虹曲水飛

輕觴兩日足可周百年事難量送客出松關壯健設門
旁揮手謝世人從今永相忘

勉子姪

外物不足恃翻覆百年間惟有萬卷書可以解我顏男
兒貴立志達人得大觀百川日夜流與海會波瀾丘陵
安於卑寧復望泰山方當少年時髮齒未凋殘聖賢戶
庭闔人人可躋攀謹勿隨餘子碌碌走丘樊

揭富陽孝子門

去年何明正有女方笄年母病僭幼弟奉佛祈病蠲既
蠲未全已剖肝代蘭荃今年盛力旺二子亦奇偉兄肝
起母病弟復先割股人生貴男兒愧此簪笄女峩峩儒
冠弁愧此田家子子謬為令長冥愚化不宣彼真天性
厚或以上澤覃勞之緡酒廩重為此詩篇揭之旌其門
觀風盛采梅既以勸邦人庶幾風普天

送夏明叔歸建寧

頃與君別時君願未生髭忽忽二十年驚見紫髯奇相

逢不相識跡刺乃得之尊酒出文卷芙蓉陰未移白露
團虛簷素蟾墮寒池何為于此時與君又語離自言其
旨急毋失舊館期丈夫屬有志富貴無定姿願君勉自力
上以慰親思明年寒鴈來殷勤竒書詞為報秋風高吳
仙得桂枝

送常世卿歸嘉興

悔作唐山來山深交友絕相逢忽相得乍見乃乍別嗟
此冰玉人寒梅踈帶雪冑泚羅文奎筆底耀離纈朝家

渴英雋結網仍高設行且收殊科勉哉嗣先烈一編忠
義傳姦萌嘆先折千載懦夫魂脆骨變奇節識此吳中
奇復幸拜前哲何異魯國人一朝獲雙玦晴雲起芝田
東風催啼鳩慈庭有近書明朝動歸轍新抽草可茵微
露花堪折相思復相思後夜天邊月

讀史有感

俗士貪芻豢喜充藜覓膈幽人樂清曠要湔塵土裳嗟
予別松林吳砧九換霜困復不知歸念之汗如漿

仲冬望日登四顧坡

往哲有清言晉人未為達此身既假合既散安用鋪大
音不在絃琴亦安所設當時逃酒徒往往畏侵及豁哉
桴海時風濤任興息

哭吳范二姊

逝者如斯乎翩翩北飛鴻鴻北來歲南人去亡回蹤庚
寅仲姊去庚辰伯姊空千里不一見血淚迸秋風自餘
只一弟留守先人宮我已日崦嵫安能久轉蓬東擔其

歸與十載山之東

輓朱侍郎

卜宅從先壟駕言練日良飛蓋駕元駟古柳被龍旌按
轡且徐驅聽歌薤露章憶昔朱峯仙浩劫思陶唐貂蟬
換羽衣翩然來帝旁西車極岷峨南佩窺瀟湘高牙開
桂林瑞節照襄陽多少經綸業春風散八荒歸來不言
功低簪鴛鴦行一朝侍甘泉天渥方對敷堂堂山立姿
九尺鬢眉蒼何為勇不留瑤宮去路長夫人有令德威

鳳趣歸凰輪摩同入道未忍遽相忘
春天渺無際春花堪斷腸
祇今楓林崗雙玉一時藏
西南多甘棠日暮人淒涼
風月三千篇爛爛光
生香佳郎與快婿
門戶未渠央三者無一憾
嗚呼公不亡

輓致政呂通議

營築未休甫曉夕留松區
忽聆載輶車歸自杭與湖冷
雨澁不晴山徑渾如塗
間闕五百灘轉軸上雲衢
純孝格玄穹安席若平鋪
憶昔祖慈親六月暑方徂
奠酒雖

百壺練溪焦釜枯今日遡長風辛岨諒一如維公有賢
稱靄然溢粉閭千金手不售其鍾後人乎天畀此石窳
指顧即吾廬且復愆以平萬家守者居甚欲一引絃山
寒阻前趨黃羅金紫峯送目但躊躇

高宗皇帝寶訓終編錫賚進詩

紅雲一朵金爐烟黃繖亭亭午漏傳龍牀猶御金華殿
方進羣儒讀寶編編中並載神堯語三十六年真復古
祇今安用讀遺書卓然已復光前緒高皇當日濟艱難

猶在經綸未備間今日山東河北地百年運去一朝還
更有祖宗傳國璽琢于元祐隆平際玉光射日篆雲飛
今日煌煌登寶几高皇一笑在天靈神孫今日再中興
賜與千秋萬歲齡甲兵洗盡年豐登羣臣尚或呻佔畢
微臣但拱圜頭立芳筵華秩及龍媒亦拜聯翩自天錫
更憶先朝徹講餘有臣曰軾感恩腴願對紫薇花影下
試草招來贊普書今也梯航幕中夏無復更待招來者
微臣但摩千丈松敬賡吉甫中興雅

秘閣儒榮堂

天狼騰騰照單于怒麤抗獄于上都松漠城高沙萬里
其下行育多穹廬皇仁配天覆中寓西垂北際杳無區
七十年來軍事絕謀臣猛將皆丘墟堯叅摧剝土氣蝕
塞馬不鳴秋草枯初連山下安穩臥歲將金帛自膏腴
文儒申申武士墮先王奮臂一長吁當時顛末誰能記
家有中原孤臣書吮血為墨膚為紙驚風吹到玉蜚除
誠通精寤動乙覽天經地緯開廟謨手援神矛截河漢

中天真人正握符蛇龍螭虎雜萬騎庸蜀荆楚從吳車
皇旅如雷鐵嶂碎沐水沄沄風噓尺檄夜傳三秦定
侵田歸魯在須臾向來孽霧漲北極羲和一旦晴光舒
頓紘提綱無虧闕澶漫萬里宣皇圖怖威報德永無畔
施令酬功偏禪供上下兩間皆叶序天錫皇壽天齊驅
炎精亦曜暢大鈞天佑皇業卑唐虞金石並奏告清廟
圓壇紫氣靄堪輿丹門宣赦傳天下百家頌聲流康
衢此時此書方策勲先王憂國榮有餘

代上楊誠齋

杜陵已醉老坡仙
生後百年恨不及
那知開眼大江西
突兀見公正冠幘
凜然清風不可攀
千載懦夫毛骨栗
暇時畧吐胸中雲
坐使九霄成五色
未辨執樂三千指
不計酒材七百石
落然收寶入丹田
歸省廬阜千尋碧
那知城裏住相如
但信城東有太白
一時餘子皆鷁退
家有諸郎傳正脉
世塵千劫都磨盡
獨有詩緣漱七極
天欲留公在世間
管領風月長為客
彩鳳一鳴天地靜

安得微吟容晚出巨止青山吞澤芥許投頑石博拱壁
先丘宰木已參天幽碣未刊但惕夕魯山四絕先李文
誼貫幽明光存歿先生匹素不可辜倘得烟雲生勃鬱
化為匹錦授丘遲磨鈍為鋤希萬一要是人貪常熟書
泝闕買菜復求益詎敢限字如昔聞小大當唯意所適
庶幾挂在露寒堂琅然一讀意一釋不須點白鱸松鱸
解衣臥聽歌赤壁

辛亥冬交石阻風三日

陰崖老虎殺氣驕一噫三日攪汰溲日寒不焰雲飛逃
乾坤蟻轉東南高疾勢已作奔天濤餘咸猶捲少陵茅
魚驚怖死蛟龍號舟中性命如鴻毛起來危立大江臯
白沙黃塵紛驛騷徐呼風伯入葦蒿指撫八極建六鰲
翁張橐籥吾誰曹太平之風不鳴條

登紫微崖

富池大信江千里三日醉臥烟篷底曉來推篷登斷岸
因憶牧之呼屐齒九華隆隆闢天春微雲低度參差是

百喚收之如不聞剝脫塵痕見文字今年十月天未霜
木葉留露光嶷嶷興亡風流不可論蒼松怪石還如此
我今與子陟層巔酌酒賦詩云樂只後來誰復是收之
斜陽歸路芙蓉水

於潛崔丞四明人同年友也方此掉鞅百未一見
而來書羅縷無非歸與語宜醉夢書邪三詩見寄
亟占數語正之

世人眼見真蓮少真蓮却在玻璃沼浣花溪水入銀河

何人更識月皎皎謫仙不見見梅粧荷稠寧作芙蓉裳
黃龍虬葉何年墮維摩雨華昨夜芳真花真詩元在眼
要須心地先清涼不然瀟湘水清寒磯月沙平水晚露
低昂勸君休問張子房鑑湖十里藕花香天駟超河夜
未央曷為自同太白光何時握手論行藏江東雲暮天
何方

太上虛皇黃庭經句法十篇壽趙帥

今存其七

太史占春纔五日東風昨夜傳消息斗邊一星下南極

飭以貂蟬扶社稷更昌斯文開民則

去冬曾說冬菹綠今年蓼甲春盤簇綵花金勝相輝屬
五色斑衣佩蒼玉先奉庭幃千歲祝

莫辭金醖十分斟邇日星郎寵數深庭前桂子更鮮新
鰲頭早晚貼塗金公亦綠殿峩乘簪

漢列土宇封同姓唐擢宗英持國柄我宋膺圖臨海
鏡參天杞梓仙源盛蕭敷艾榮何足訂

向也何幸識仙翁玉粟春明盛德容又常一再見河戎

神情穎異機生鋒公家流慶無終窮

明年天使九街馳御茗名薰宣玉詞更敕儀鸞餉壽卮
我有新曲名紫芝會當獻之鳳凰池

喬松落澗節輪囷詩書萬卷終經綸日華隔霧光難晨
公獨知其墮凡塵何當一為問大鈞

郊臺信筆

江天欲雪未成雪推出雲頭照霜月此夕更長不可辜
何時百萬入彩盧幾年長涎一車麩輸他獵奴飲生肉

也須龍伯坐鰲頭却看沙磧臥鰕鯨

玉堂畫值有懷萬松

鷄籠峯下萬松山中有游民天地閒左架虹腰上元圃
右騎鰲背度飛闌幽壑流泉噴三峽袞袞桃花翻浪雪
兩山對峙錦屏開媽紫肥紅仍炫白十里松風百哢琴
丹書一枕臥殘春何人共結無生社冉冉青蛻下玉麟
九華突兀匡廬禿幽深全似入盤谷懷山一夜鬢如霜
畫作烟圖入洛陽玉境那容几骨汗急草天章訊歸

路磨松琢石歌太平亦表微臣報國恩

汲井溉田民亦勞止歌以相之

短綆長鉞高下飛老農雨汗紅淋漓夜來雨意已垂垂
一事不成風又吹決破玉龍太清池滿浸萬頃碧琉璃

贈梅菴

高座不知甚面目當時喚作尸利密要須勿負此標題
更向托茶山頂立

伐千秋巨木竟梁梅堂

二木盤根三千秋萬斧過之無敢眎今辰有梓號國工
朋曹十數來睥睨為言此木難斤斧上有蟠龍下伏虎
莫教驚動萬年枝掣電轟雷三日雨直須作法起南風
號召百神同力扈昂昂頭角向梅堂五六鎮星來作輔
坐令國勢鞏蘿圖萬歲千秋奉明主

奉送季清赴山東幕府

黃雲銜雪天模糊有客飄然出上都青絲絡馬銀兜鍪
紅錦鞵弓金僕姑劍光壓西照路隅怕首百騎前訶呼

不知客本山澤臞今何為者意氣麤自言有將新孫吳
我欲與之同力扶嗚呼滅敵豈難且病兵法將自逃逋
君不觀昔我藝祖造中區以兵為國垂洪樸河北河東
義勇徒二十四萬鼓應枹中興益振尺五符世忠淮左
聚熊羆劉錡淮西貌虎俱上流岳飛彎天弧金陵張浚
羸搏狐單于臺下雖寬誅采石山前已斷顛邇來殘敵
尚窺窬門內羣寇更睢盱遂乃股剝及其膚豈止牛羊
不求葛我欲別幕飛於菟十萬一屯淮之區技閑器利

整平居幟明鼓震蒐彼廬精神所折渾如無而況山東
羣盜乎五符倘缺聽其虛十年且盡一賤租斬然圻畫
勿牽渠他時混一更新圖偉哉玉帳得通儒君復碧油
吐良謨凌烟豈一貂蟬與

新舊句

憶昔丙辰還親旁恰恰先春社三日社日侍親行交源
紫巖兒奉森玉立是日天明風氣柔入自交源茗源出
迤邐又復至前山涉澗還家日將沒慈親意在營一丘

眷眷欲于近舍求當時議論悉未定那知今作汪潭游

汪潭去家正五里百里來龍于此止

至此七韻不記甚年作壬辰秋孟中

浣日足下一段

龍止水亦止清潭窈無底寶劍秋空橫秀峯春

筍峙最愛了角羊艮木之印御長生亥水來朝丙千古
長長溪流不盡雍容冠佩紫薇垣壽星更出丙丁間神
游既安復昆福賦此銘章皆實錄

子時歌

順數方來兮溯而上之洪荒今不必短兮古不必長地

有時而玄兮天有時而黃知靡草之先秋兮又當知喬
松之傲霜知滄溟之連山兮又當知太華之有長江朝
云西暮云東兮宣期悉避乎陽光入濛汜浴虞淵兮又
孰知其扶桑吾烏乎而折衷兮但當付萬化于茫茫

郊祀慶成詩

有序

臣仰惟皇帝陛下躬上哲之性遵列聖之謨穆卜新
陽昉嚴大報天地合饗祖宗並崇晴光映於祥光冬
夜溫於春夜燭花如綬蕭烟不搖頌聲流乎天衢英

風薄乎榆塞臣待罪翰墨幸列侍祠懿鑠鴻休得所
親睹謹撰慶成詩五章一章述大典也二章玉輅如青
城也三章升園丘也四章禮成也五章言天眷聖德
並隆不已也干冒天威俯伏惶懼

粹古皆頻歲炎劉或異祠有唐方定制我宋遂因儀列
聖馨明德皇穹答顯祺恭惟聖天子大典應昌期

涓潔先原廟純忱歷太宮八神開列闕萬騎擁豐隆軌
道清風肅洪頤麗日紅康衢聽細語八彩更重瞳

牙籤猶未進玉冕已先須峻級飛平步端圭卻掖扶祥
光西霄極和氣滂天區福飲烟升已儼神靄瑞符

紫時祇堂陞蒼龍奉駕回邊塵知雷掃歲稔卜年開丹
鳳覃天澤東朝奉玉杯樓前呼萬歲碑隱動春雷

謂聖惟能饗由心克致虔天心今答聖聖意更祈天沖
性猶勤德搜求愈任賢愚臣輸至愷端在賦甘泉

丁亥閏五月十日回自真聖道坊車中記事

列嶂羅屏合回泉玉帶環外容三肘密中著十洲寬天

意驅蹲虎人心見聖蟾煩君招舊隱來此共潺湲

書富陽普照院二首

境勝由盤古聞名自謫仙一從江國後又到老坡年山
頂烟仍紫樓頭月故圓繼今知幾劫風物更依然

祇愛招提古那知俗更醇寺雖炎漢代人尚葛天民僧
定都忘客林深自鑱春我來千載後更有後題人

紅藥當階翻

枝官試

禁近烟光潤階平日影喧黃麻芳草罷紅葉正花翻舊

色浮春動清陰匝午繁心傾青瑣客香滿紫微垣漏永
文書靜天低雨露溫人言有仙骨早晚拜明恩

夜登釣石

頗憶嚴君瀨還尋釣石緣鄰雞方叫月邊鴈恰書天句
秀來仙白聲和應樂全展編真一快如放五湖船

輓程給事

戀闕葵心在懷山秀野寒華繁常侍媿草隸折衝難結
綠紅輝碎懸蓂夜色殘平生桑梓地雪涕景雲端

輓汪給事

抱大難傾索隨時欲見田星災諸葛日齒少紫芝年曹
國麟枯骨藍田玉祈瑄忍聞環珮響帝所待鈞天

輓范端明

諸老多淪謝惟公尚典刑謀謨闕社稷風采聳朝廷政
路方虛席台躔遽折星幸哉芳史在寧用問丹青

輓吳郎中

志抗金堅厲材成玉粹溫時哉非不遇命也更奚言季

子風流遠吳公治行存敬亭無恙否愁絕暮雲昏

輓程樞密二首

厚德推吾黨脩名霽列紳明經魁別幙伏節聘殊鄰南
嶠思良牧西樞失重臣龍原高冢在千古臥麒麟

忠壯源尤遠新安盛莫偕千年瑤斗柄一夜玉樓階學
業光文簡儀刑謝良齋曉鐘傳恨處清淚落天涯

輓宜人趙氏

分胄天皇媛求嬪相國孫孝慈山上梓法度澗濱蘩鳳

去簫沉響鸞空鏡掩痕家庭熏沐事千古說南軒

輓徐提舉

人品真豪爽天姿尚典刑畫簾深院宇奉旆擁郊坰雲
子千艘白鹽烟萬竈青南州高士傳三嘆一彫零

輓蔡祭酒

孝友尊前哲詞章裕後生栢臺真御史槐市大司成騏
驥風方力舩腥浪忽傾山寒丹旆急識者為沾纓

輓曹監丞

學漱千江水才雄百尺樓
息飛思葉縣燕寢憶蘇州
有感珠還浦無苛虎渡洲
浦江天闊處缺月正如鉤

威鳳方翔漢寒鷗已宿林
平生惟好士無日不揮金
駟壯頻催駕琵琶遽絕音
山名昇白日回首一沾襟

輓錢塘蔡令君

少年思賈誼中壽憶賓王
軍政存鍾阜民庸在括蒼
馬蹄歸鳳闕車軸折羊腸
喚起青油夢悲風攬白楊

輓王柳州

才華唐令尹名勝晉叅軍善政流汾水遺風龍表縉雲寶
釵當自合神劍不中分心折白巖路猿吟日未曛

輓楊提舉

風慘琳宮曉雲愁鐵甃春鴻冥方避弋鱸集遽成塵金
虎多遺愛銀菟愧後人尋思漢循吏竹帛遂時新

五十六字庸以告未知野夫者

寧須山澤論高平但要曾餐石決明三世擊鐘敲玉磬
十年學劍斲銅釘倘知狐祖天邊去肯向蠻奴脚底行

更許野夫尋上著十洲三島一宮城

慶元丁巳十月奉親如臨安宿西菩寺表弟吳克

仁俱馬二首

熙寧相望百餘年又有人如古鐵頑日落尚憐今夕路
月明無恙舊時山朱紅野實堆盤裏粉白詩牌滿壁間
欲為慈顏供一笑更留數語任渠刪

安車未向都門移且覽西菩一段奇路入山腰須種樹
泉流石齒莫開池重來坡老今誰是出世參寥不記時

結束匆匆出門去白雲明月舊相知

用朱經畧韻

歸來南索舊蕭蕭但有新詩照佩璫峴首溪山歸點
染湘天風月困吟嘲輕裘詩帥風流在岳牧詞臣意
氣饒且說玉堂須翰手公當歸侍紫宸朝

用丘樞密韻

起自澄江應夢求天還河北百餘州嵩瀍處士歸羅致
淮蔡竒謀入穀收午夜金陵瞻斗極千年玄昴滅旄頭

會須再作中興歷還許諸生執筆不

作堂六桂之東命之曰桂生取漢人招隱篇桂
樹叢生之語也詩以記

幾年列植擅清芳今日標題始作堂遠向松岡分老
蔭近於菊畹借寒香地雖未離人間世心已全然物
外鄉最好夜來清絕處飛霜帶月下南塘

和費樞密登卞忠貞公墓

底用荒村訪野墳青編相對儼如存當年但識清談

樂今日方知節槩尊千載腐儒空弔古幾章冷語自消
魂便當僂力清河洛一洗新亭舊淚痕

流觴西湖用范左史韻

畫航同載若登仙却笑泥羈馬不前要識冷烟催穀雨
須知澹日養花天千條翠柳隨風舞一樹夭桃照水妍
須信人生行樂耳虛名那用世間傳

雪

北風傳信報登平白帝宸遊墮玉英月下草玄疑蜀客

鼎邊得句失軒明
莊嚴東閣若為好
點綴南枝分外清
惟恨蔡州城北水
一池鵝鴨更無聲

小憩許由亭

歷數河南去乾坤
一草亭一亭猶是累
千古盡浮萍

喬松

風細吹吟鳳雷驚起
蟄龍幾年臥空谷
今日享真封

歲暮

綵帖瑜糜濕屠蘇
琥珀濃夕陽猶臘
日午夜已春風

三月三日度白際

日望黃尖杪，今登白際巔。千山皆委地，一臂獨擎天。

戊子正旦賀壽慈宮二首

曙色浮丹拱，春風煖禁街。微瀾迷秀石，纖草蔭新槐。
鳳駕回天仗，駕班集露門。須臾趨魏闕，杲日正中暎。

粥罷

飯已茶三啜，隅中粥一盂。陶然詠皇化，安用束封書。

水

白日黃流漲渭城三更風急盡成冰莫言此物渾無用
曾向滹沱渡漢兵

甘將軍廟

沙寒日薄水雲愁賊魏王吳一夜休自是英雄元不死
至今猶占大江流

晚發富池

甘王樓下一帆風獵獵舟旗照日紅醜酒三江飲龍腹
摩挲冠冕是誰功

昭明太子宮

千章喬木烟蒼蒼一帙遺文字字香梁鼎西沉何處問
至今戟手看興亡

陳時栢

陳未亡時栢已蒼風來歷歷說興亡世臣元不如喬木
閱盡中原幾戰場

夜雨

元機粗透古人骨每說匡來晚未工珍重芭蕉前夜雨

為傳消息到牆東

築徑

入門一徑小紆回
百本芙蓉手自栽
寄語後來須善護
三年猶及見三開

觀史有感

紛紛賓客趨驃騎
何事任安太樸踈
却笑君非王太傅
不容朝士不回車

別金陵官舍雙栢

手自移時尺許長三年拂拂及宮牆願言勿負栽培力
保此堅貞傲雪霜

復朱教授

某前雪蒙佳句再雪乃得為謝信矣
相如之思遲也然亦遂為一段公案

詩成催雪豈無功今果裝嚴七寶公休說春花那解舞
也教且熱慰新豐

送李侍郎安撫浙東二首

通明殿上紫芝仙乞得閒身下九天今日都門臨祖處
幾人驚嘆着鞭先

夜來天闕望文昌移在藩臣斗極旁千尺濤江元不遠
公當早晚對明光

直廬閣賦二首

一陪鸞鳳入仙臺四見薰風舞禁槐自笑平生無夢到
那知今日以身來

紫宸朝退曉光寒百吏奔曹一吏閒便可雲卿稱散秩
奈何名籍尚人間

雪霽玉堂曉眺

當年銀界隔鯨江今日分明玉作堂不是瓊林宮樹密也應白虎接明光

兩炬並花

雙蓮合藥更開花報道金鑿日未斜已草禁中新鳳詔趣君十日覲東華

脩玉牒官閣子坐屏甚古詰吏亦不知曷始數語紀之

摩詰何年留此筆至今雙壁猶當翠老松掀甲作風雨

亂石激流殷霹靂

吳綃一幅苦無多
中涵太華及黃河
偶然乘風山下坐
紫烟翠靄坐中過

早入

紫薇浥露翠條深
捷捷靈禽振好音
全似氷巖亭上坐
四屏烟靄奏春禽

直廬多暇新綠鬱然信筆二絕

朝絕倖恩除日少
邊清妖祲檄書希
飯餘摩腹閒行立

一抹牆東新翠薇

壁石方壺浸碧天依然全似太湖邊
清風一夜生新興
好把漁竿上釣船

江山道中瀑布

松風一壑逼人寒老石琤琤響碧端
疑是銀河天不鎖
瀉從雲際下人間

梅花

青琅削葉玉花鈿獨占炎皇第一天
未羨冰桃垂夏後

且看金子繫秋前

朱生論天

不知占得幾躔星閱盡人間聚散萍今日重來橋上望
依然楊柳兩青青

為釣臺作

人道秋風長桂時天台散種未為遲如君筭到白榆窟
揀取南來第一枝

擁爐

已甘灰冷竹窗前
那意移來近繡氈
惟有幽人一寒暑
閉門高臥雪深天

中秋無月

常時斗暗猶閒事
無月中秋可若何
我欲梯雲千萬丈
取光還月謝羲娥

春帖

輕烟薄霧鎖平川
全似江南二月天
昨夜溪頭新雨過
分明洗出太平年

程掌書二首

夜來踏月過臨川水面粼粼桂魄圓
此際高人方熟寐
難為一扣綠筠軒

分明如夢縞玄衣
傍月凌風自在飛
夢覺出門都不見
不知已上子陵磯

此行專看釣石

孟夏廿一東作秩然

不見東耕四十年
茲晨蓑笠去翩翩
從今數過三賞朔
史筆當書大有篇

五鼓夢中作覺而成之二首

人生萬幻一釐輕須築銅駝萬里城莫道斜陽光不遠
斷霞收盡十分明

當時千駟已無聞寧說牛羊上塚行同是博陵評古者
肯令千載尚艱卿

閏九十四

午夜青衣海上還八年兩度雪封山如今一水平如鏡
好釣桐江五百灘

送松煤十九與葉秀才

雲溪深處萬松林
烟起晴天自作塵
根向九華分結處
與君同是墨仙人

出南郊清甚

春風吹屐到南園
著酒塗酥花正繁
更喜滿庭無俗物
橫塘踈竹渭南村

輓太府丞知徽州韓公

翊運勛臣第一家
却于翰墨拔英華
誰知忠孝千年事

不逐春風落水花

魯國夫人薤露歌

並海名山萬疊開
太慈太白等蓬萊
自從齊國鋤雲後
又見夫人駕鶴來

欽定四庫全書

兩宋名賢小集
卷二百十六

三

兩宋名賢小集卷二百十六

欽定四庫全書

兩宋名賢小集卷二百十七

宋 陳思 編

元 陳世隆 補

桂巖吟稿

朱晞顏字子困新安人慶元中廣西漕使

疊綵巖登越亭

不到越亭久榴花今已紅江流寒瀉玉山色翠浮空百

粵薰風裏三湘夕照中行藏仗忠信六合本同風

朝陽洞

湖上初驚八月秋嶺頭又見桂香浮巾車幾憶陶彭澤
竹馬多慙郭細侯未遣靈泉還舊隱且同巖壑訪真游
一枰勝負人何在試問樵柯已爛否

遊壺天觀泛舟過龍隱洞小酌至月上而歸

浪道湘南是瘴鄉玉壺銀闕四時涼臥龍不起葭灰動
愛日空驚繡縷長浮蟻且同佳節醉探梅不作少年狂暮

歸憇媿山頭月照我駸駸兩鬢霜

伏波嶠

天斷神剌不記年洞中風景異塵寰江波蕩漾青羅帶
崖石虛明碧玉環地接三山真蹟在天連合浦寶珠還
重來恍似乘槎到慚愧雲門夜不關

彈丸山

傷弓枉木漫猜嫌岩石稜稜彈樣圓鷗鷺橫空秋凜凜
鳧鷖渡水晚翩翩私心灰冷慵思繳蹇步塵勞不受鞭

挾彈張弓付年少歸與趣取菊花天

洞底石間得枯木一株花葉咸無而枝幹峭拔扣
之鏗然有聲因成都句刻之岩石間

天教海若效珍祥不與千林春競芳擲地遺音清曼玉
凌雲直幹凜凝霜誰浮鯨海星槎到猶帶蟾宮月桂香
冶葉浮光埽除盡堅高直欲共天長

暇日過龍隱山有以千葉白梅獻者輒成鄙句

素艷重重疊雪輕先春不怕雪霜凝人言五嶺地皆熱

誰折一枝寒欲水似笑踈花太孤瘦故教密葉擁千層
湘南別有新春樣拚醉花前喚不應

慶元改元寒食日陪都運寺丞遊白龍洞時牡丹

盛開小酌岩下夕陽西度並轡而歸

小溪漱碧响潺潺路入龍宮杳靄間佳節漫添新白髮
故人賴有舊青山花朝幾共湘南醉萍跡何年嶺北還
歸路連鑣紅日晚多慙龍臥白雲間

龍隱岩

聖主龍飛已在天洞中猶有老龍眠便須吸盡西江水
霈作商霖大有年

韶音洞

曾按薰絃天一方埽除民愠變清涼遺音凜凜猶聞耳
不獨當年味可忘

兩宋名賢小集卷二百十七

欽定四庫全書

兩宋名賢小集卷二百十八

宋 陳思 編

元 陳世隆 補

文惠詩集

徐經孫字仲立初名子柔豐城人寶慶二年進士授
瀏陽主簿潭守俾部牙契錢至州有告者曰朝廷方
下令須行十七界會令若此錢皆用會小須則幸而

獲大利矣經孫曰此錢取諸保司出諸公庫吾納會而私取其錢外欺其民能欺其心矣可哉詰旦悉以所部錢上之其人驚服有愧色辟永興令知臨武縣通判潭州帥陳韓雅相知事必咨而後行秩滿由豐儲倉提官進權轄國子博士兼資善堂直講為監察御史劾京尹厲文翁言偽而辯疏入留中宣諭至再即日出關上遣使追之不及進直寶章閣福建提點刑獄號稱平允歲餘陞安撫使召為秘書監兼太子諭

德經孫為安撫時韓家居門人故更有撓法者不得
逞相與搖撼至是韓起家判本郡懷私逞忿無復交
承之禮即日劾奏通判削其秩經孫造朝具白其政
府事上聞帝大怒諭宰執曰陳韓老謬至此宜亟罷
之於是經孫再請政府言某韓門生也前日之白公
事也苟韓以是得罪人謂我何請之不置俾自乞閑
明通判無罪識者韙之遷宗正少卿起居舍人起居
卽入奏君人者當守理欲之界限遷刑部侍郎兼給

事中陞太子左庶子太子詹事輔導東宮者三年數
陳經義隨事啓迪太子入侍必以其所講聞悉奏之
帝未嘗不稱善景定三年春雷詔求直言經孫對曰
三數年來言論者以靖共為主有懷者以譁訐為戒
忠謹之氣鬱不得行上帝降監假雷以鳴切中時弊
時公田法行經孫條其利害忤丞相賈似道拜翰林
學士知制誥未踰月諷御史舒有開奏免罷歸授
湖南安撫使知潭州不拜授端明殿大學士閔居十

年卒贈金紫光祿大夫經孫所薦陳茂濂為公田官
分司嘉興聞經孫去國曰我不可以負徐公遂以親
老謝歸終身不起

題施山觀音閣

閣道連雲棧簷牙覆竹陰南來天馬渡北落水龍吟林
鳥疑譚偈田花欲布金凭欄觀下界洞見遠公心

病中有感

習懶多成病旬餘久覆杯帳中聞燕語瓶裏看花開醫

已肱三折愁來腸九迴何時得踈散屐齒印蒼苔

贈曾司戶

君家螺江頭我家劍江邊千載會相望飲水同一川
竭來古梅開相識春風前高義軋層漢清談響幽泉
努力効徃哲勿為時俗牽

和黎丞梅關嶺

峭壁接高天閑雲淡橫嶺稍便僧房靜未覺官曹冷
風月兩閒人山川一佳境誰歟共茲樂老仙白垂領

丙戌年新春偶成

新年十許日才有一篇詩鄉思風中亂春心雨裏知病
緣衰驟至懶與睡相宜暗想泉溪上杜鵑啼故枝

小英石峰

舊作英巘隱今為庾嶠行雖然一拳許有此數峰青峭
崿驚凡目堅剛悖世情墨鄉相指似只尺是蓬瀛

送大庾黎丞

客懷秋易惡送客更當秋薄宦相從久孤征肯暫留酒

輕離思重目短大江流黃菊聊持贈寒香晚不羞

月夜赴郡會歸鞭轉不成寐觸事感懷

庾山高入雲章水清見骨山高晚宜梅水清寒浸月美人天一方雲煙妙空濶帶月簪梅花獨起舞殘雪

覺溪八景 今存其三

雷奔石壁間瀑瀉洞門側蜿蜒乘洪濤變化莫可測

龍門

春浪

山圍古寺陰曙隔鯨音發悠揚三四聲喚上東林月

隆福

鍾晚

飄瀟鷓鴣羣
浙澀菰蒲晚
雲斷山月明
新泉落前澗
塘

暮雨

雜興

梅花亦何奇
偏得幽人愛
清寒風雪夜
一枝靜相對

自贊夏端甫所繪真

老我不堪位置
歸來久溷漁樵
忽然珠玉在側
見之令人

人意消

出朝賦歸來好

歸來好籬下菊花應未老
晚香猶可薦清樽
淵明醉後
和衣倒

歸來好一入山林跡如掃
杜門謝客免愆尤
几淨窗明
讀莊老

恭賀御製詩

多士新彈禹貢冠
對天忠切動龍顏
臚傳聲徹頒袍笏
燕喜筵開肅佩環
樂奏簫韶成廣內
詩成奎壁照人間

徵臣捧詔慚踈拙祇抱傳宣拜賜還

福州即景

一別居諸歲月增遙聞此景畫難能
潮田種稻重收穀石路逢人半是僧
城裏三山千簇寺夜間雙塔百枝燈
常年六月東山裏地湧寒泉漱齒冰

長孫敏學授承務郎

辛勤場屋一書生六卷時文漫策名
身事兩朝奚所補恩覃五世亦何榮
前人慶澤宜豐報兩輩官曹詎可輕

移孝為忠斯不負更須勤學紹家聲

送仲時弟

江關千里隔山川有弟能來慰眼前
方喜雁行隨處樂
可堪蟾影別時圓
暑行勿亟宜強飯
湍激多驚莫問船
歸到家山相勞苦
團欒却是菊花天

乙丑三月十二夜夢得家有園池樂壽康之句
覺而足成効卽康節作首尾吟

家有園池樂壽康
閏中日月覺偏長
睡餘携杖遊花園

飯後呼童給鶴糧
堆案縱橫書數冊
隨盤歡喜酒盈觴
客來問我渾無事
家有園池樂壽康

兩宋名賢小集卷二百十八

欽定四庫全書

兩宋名賢小集卷二百十九

宋 陳思 編

元 陳世隆 補

東萊集

呂祖謙字伯恭尚書右丞好問之孫倉部郎大器之
子上文靖公夷簡居壽州至右丞從駕南渡始居
金華祖謙登隆興元年進士復中博學宏詞科累除

直秘閣著作郎國史院編修卒有東萊太史集

送宋子華通判長沙

騷人故悲秋九辨播三楚宋公舊題壁文彩照潭府千
載得君侯遙遙接華譜還當初秋天又進湖湘艣當家
多勝事此役可兼取江山日日新似若相勞苦木脫獻
羣峰雲生失前浦况待別乘權光華動徒旅元戎下分
庭百吏羣趨廡後車載仁風習習被南土預知潢池盜
無復驚枹鼓正當勸賣劍不必禁挾弩入獻有訐謨論

賞駢圭組臨分一杯酒不為離愁舉

送丘宗卿博士出守嘉禾

攜李國西門道里去天咫訟庭人摩肩客館舟銜尾涼
燠變須臾風俗怵駭視心平理自見周道本如砥

堂下萬休戚堂上一笑嘖是心苟不存對面越與秦豚
魚尚可孚况此能言民君看津頭柳葉葉皆相親

奮髯疾抵几解衣徐探雛古來多快士氣吞兩輪朱簿
書尚没人迎筆風摧枯自許豐不豪歲晏終何如

折肱稱良醫識病猶身傷開府事如麻豈盡昔所嘗平
生老農圃易置復難忘麥黃要經雪橘黃要經霜

城樓

城峻先迎月簾疎不隔風棋聲傳下界雁影沒長空鳥
嶼秋光裏樓臺海氣中登臨胡待晚雨外夕陽紅

野步

石梁俯清流苔髮胡可數茆檐春晝長寂寂亭陰午鳥
啼花徑深風絮浩無主幽人不可覲棋聲時出戶

聳采若府推母錢夫人輓章

內助名推冠名成父子間中原遺俗盡舊族素風還石
窮天開邑宮門日綴班光華竟何許夕照在西山

王龜齡詹事輓章

語老收聲盡佳城又到公蒼天那可問吾道竟成窮旌
卷莆田雨簫橫雲浦風今年襟上淚三哭萬夫雄

太史交旃際元戎卷甲秋先鳴驚衆寐孤憤厭羣咻羽
翼新鴻鵠聲華舊斗牛斷橋無恙否落月照寒流

魏元履國錄輓章

麻衣見天子拜疏不知休
落落山林氣拳拳畎畝憂
極知千載遇政用一身酬
繞舍閩溪水朝宗日夜流

羣公祖疏傳多士送陽城
短棹泝前約長亭及此行
深留移白日緒語只蒼生
會綺山陽賦隣人笛未橫

題歸庵

雲壁開蒼峽風林捲翠濤
諸松皆老大一嶂獨孤高
發興雖公等尋遊許我曹
秋光端可賦不是楚人騷

王通直輓章

近來南國塚半是北人墳異縣誰憐我同鄉又失君深
居傳雅尚堅坐挹清芬日落長安第三槐拂暮雲

興同館遊張氏園分韻得日字

出日歎囂塵入門倦佔俾駕言城北園滯思頓消釋方
池環脩篁廣陌衛行栗先雪梅已苞後霜草猶拙上躋
極高明旁穿復深密主人真喜事秀句屢盈帙招呼文
字飲及此三餘日山林與鐘鼎零茂本非匹斯遊豈偶

然書板記甲乙

寄章冠之

章侯平生一詩囊
酬風酢月徧四方
浩歌姑熟酒淋浪
醉呼太白同舉觴
遂登浮玉臨森茫
江濤挾筆益怒張
沙頭倚檣樂未央
興闌忽上秋浦航
門前槐花日夜黃
閉門琢詩聲繞梁
白袍紛紛渠自忙
飄然邂逅非所望
自言久厭世鎖韁
合眼已夢廬山蒼
君材甚碩氣方剛
身雖欲隱文則彰
江湖故人半朝行
左推右挽摩天翔

而我戢翼甘催藏不能與俗相迎將徑當行前掃山房
俟君功成還故鄉却駕柴車迎路傍

送柳巖州解官趨朝

一葉初秋已趣裝墨書頻下駐歸艍少留北闕三年最
多借西州半歲強身外寵榮元自薄眼前凋瘵故難忘
書囊知有朝天草豈是中和樂職章

蘇仁仲計議輓章

幽棲略具便休官帝遣蒲輪喚不還大似文元居道院

又如白傅過香山夢回帷幄青冥上醉墜風波浩蕩間
向使胸中有勞辱那能八十鬢毛斑

登門疇昔奉從容發越之間一水通今日江東無賀老
去年牀下拜龐公舊來議論多遺落新出傳聞或異同
已矣從誰判真贋汗青連屋未施功

向運使輓章

戟衣翻戶映庭槐使節州符未展才文獻定知丞相似
淵源還自洛陽來異端惑世深於蠱古學違時冷若灰

從此湖人識喪禮凜然治命手親裁

何茂恭母王夫人輓章

南陽人物盛諸何壽母皤然樂事多堂下無憂萱弄色
天邊有信桂交柯黃金籬滿經方重白玉樓成恨未磨
空誦安仁舊時賦版輿零落故山阿

次韻葉丞相陳尚書遊南園

樂事良辰古所難三分春色一分寬潤花雨過紅裙濕
倚竹風斜翠袖寒自有南堂誰舉白可無東絹為施丹

兩翁醉墨曾題品，便作平泉草木看。

送喻叔奇通判會稽

鳴騶前日餞出使，推鼓今日送作州。會稽別駕官尚薄，
道傍羨者何其稠。版輿有親餘九十，東南之美供甘柔。
先春鑄芽入午啜，破臘箭茁充晨羞。况復詩壇執牛耳，
所至風月相獻酬。千巖萬壑遍題品，會有采者人名道。
賀車駕幸秘書省

麟臺高柳識雕輿，共記中興幸省初。黃道再傳天子蹕，

青編重入史臣書，需雲下際君恩盛。
晨露高張樂節舒，若寫鴻猷參大雅。
定非周鼓頌豈漁。

紫清丹極與天隣，閭闔乾坤繫咲嚙。
獨為斯文回一顧，坐令吾道重千鈞。
先生舊物參差見，列聖明謨次第陳。
墨客區區感滌過，豈知深意在彛倫。

西興道中

鳧鷖迎船似有情，隨波故起綠粼粼。
野花照水開無主，誰信春歸已兩旬。

桑麻張主不知春常恐鶯花太斷魂東岼紅霞西岼柳
却將影色為平分

春日

短短菰蒲綠未齊汀洲水暖雁行低柳陰小艇無人管
自送流花下別溪

一川曉色鷺分去兩岼煙光鶯喚來徑欲卜居從釣叟
垂楊缺處竹門開

檐鐸無聲鳥語稀徑深鐘梵出花遲日長遍遶溪南寺

未信東風屬酒旗

曉春

風絮流花一任渠
北牕高臥綠陰初
閉門春色闕中老
為謝平生董仲舒

遊絲

游絲浩蕩醉春光
倚賴微風故故長
幾度鶯聲留欲住
又隨飛絮過東牆

祭酒芮公既歿四年門人呂某始以詩哭之

少年把筆逐班揚，咳唾珠璣落四方。
歲晚寒窗渾忘却，瓦爐香細雨聲長。

聞人有善已伸眉，倒廩傾囷更不疑。
莘莘萋萋竟何許，卷阿空老鳳凰枝。

先生墓木已成圍，弟子推頽晝掩扉。
大雪繁霜心境寂，有時清夢尚摳衣。

送朱叔賜赴閩中幕府

止戈堂上履聲聞，飛蓋相追杳靄間。
君到定知難入眼。

倚天瀟霍是家山

路逢十客九青衿半是同牕舊弟兄最憶市橋燈火靜
巷南巷北讀書聲

題劉氏綠映亭

涼葉翻翻不受塵芒鞋藤杖及清晨開窻小放前溪入
澄綠光中獨岼巾

鷺浴魚跳石鏡屏搖青浮碧太鮮明牆東種得陰成幄
隔葉看來覺有情

夜宿浦城魚梁徐刑定子出示林謙之挽其二
詩時謙之方按刑廣東有懷次韻

五年不說空山雨今夜魚梁着釣船為問故人今健否
枕椰葉暗瘴江邊

何叔京挽章

傾葢黃亭夜儵然淵壑姿倚天惟直幹到地絕傍枝
壘今何許悠悠只自知寒碑卧風雨千載有深期

咏杏花

江梅已過杏花初尚怯春寒看
檠踈待得重來幾枝
在半隨蝴蝶半蜂鬚

恭和御製秋日幸秘書省近體詩

麟閣龍旂日月長中興再見赭袍光
仰觀焜耀人文盛始識扶持德意長
功利從今卑管晏浮華自昔陋盧王
願將實學酬天造敢効明河織女襄

挽汪端明

異時憂世士歎息恨才難每見公
自健猶今我意寬彫

零竟何極合復豈無端此理終難解天風大隊寒
四海膺門峻親承二紀中論交由父祖受學自兒童山
岳千尋上江湖萬折東微言藏肺腑欲吐與誰同

挽蕭祭酒

摩揣誠斯薄雕鐫質亦消平生但真樸直上絕枝條氛
霧終澄霽丘山亦動搖朝陽舊時鳳聲入舞簫韶

兩宋名賢小集卷二百十九